



講毋聽，討皮疾？

「喊你毋好去大溪灑爽水，你偏偏愛去，講毋聽，討皮疾啊！」做爺衰个，總係會愁慮自家个子女，平常時定著會三交代四吩咐，做毋得爽這、做毋得賤該。毋過，細人就係細人，大體就係一隻耳空落、一隻耳空出，哪有想恁多？逐擺分人湊啊著，有好爽就好，爺衰个叮嚀，早就毋記得淨淨咧！一直愛到有人摻爺衰投，也係轉到屋下脛著世大人个面色毋著，正知壞忒咧！這時節，最好自家知衰，鼻空摸摸仔，皮弓較龜兜，毋使再過詢麼个，脛竹筱仔做得食較少兜無！

頭擺个人有兜會擎竹筱仔來教子兒，講毋聽个綻琢頭，定著就係討皮疾，該下係用「皮會疾」來嚇細人，分佢兜驚，正毋敢毋聽爺衰个話。時代變咧！現下人已經少用竹筱仔來教細人咧，大體係用說理个、勸話个方式，用結果來話細人莫做一兜對自家、對人有傷害个事情，係講毋聽，到時自家著傷，該就毋好喊人艱苦、身體疾咧！

有時，毋單淨細人會講毋聽定定，大人乜共樣會講毋聽，討皮疾。比論講，政府再三喊人「食酒莫駛車，駛車莫食酒」，加上這下罰恁重，還係輒輒有人講毋聽，食酒後強強愛駛車。等到出事情咧，除忒自己賺皮疾以外，還造成別儕个傷害，正經係害人又損自家。另外，有兜毋好个習慣，像食毒、賭徼，會對自家摻家庭造成大傷害，雖然儕儕知道理，毋過，還係有人會毋自重，忍毋核去試脛啊，結果摻好好个人生滅到壞淨淨！

人到底愛仰般正會學著教訓，正毋會講毋聽，討皮疾呢？佢想，最重要个就係人愛學會對自家負責，就係「自律」。相對來講，竹筱仔、法律主要係用外力來責罰違規个人，係愛監人來守禮規，係「他律」。這兜外力愛有其他个人來執行，毋過，執行个嚴摻鬆對結果會有盡大个差別，還有，也無可能項項事情管擎擎，所以，竹筱仔摻法律並毋係防止「討皮疾」个好計，還係愛翻轉頭來，從細培養人自重个態度較重要。

人細个時節經驗毋罇，會講毋聽，討皮疾，係因為毋知驚。想愛順利成人長大，定著愛有爺衰來搵手。家庭係養成個人態度最先摻最重要个場所，係世大人做得講分子兒知麼个做得、麼个做毋得个理由，等細人自家知道理、肯擔輸贏，有好个態度後，該竹筱仔就用毋著咧！也毋使驚子兒會講毋聽，討皮疾！

作者：林伯殷

☆詞彙學習☆

【討皮疾】to` pi cid：討打。

【賤】cien`：亂動。

【湊】ceu`：邀約。

【詢】au`：辯解。

【竹筱仔】zhug` siu er`：細竹枝。

【綻琢頭】can` dog` teu：頑皮的小孩子。

【話】va`：勸說。

【賭徼】du` giau`：賭博。

【滅到】med` do`：搞到。

【監人】gam` ngin：強迫人

【擔輸贏】dam` shiu` rhiang：負責到底。